

RESOLUCIÓN REITORAL DO 10 DE XANEIRO DE 2011, DE MODIFICACIÓN DA RESOLUCIÓN REITORAL DO 27 DE OUTUBRO DE 2008 POLO QUE SE ESTABLECE O PROCEDEMENTO PARA O RECOÑECEMENTO DE COMPETENCIAS NAS TITULACIÓNS DE GRAO E MASTER.

A USC aprobou a normativa reguladora do procedemento para o recoñecemento de competencias nas titulacións de grao e máster, consonte á normativa do RD 1393/2007, de 29 de outubro e no marco do Acordo de Consello de Goberno de 14 de marzo de 2008 (Normativa de transferencia e recoñecemento de créditos para titulacións adaptadas ao Espazo Europeo de Educación Superior).

O RD 861/2010, de 2 de xullo, modificou o RD 1393/2007 no relativo a esta materia (concretamente o seu artigo 13º), o que esixe adoptar a normativa interna antecitada. Para ilo, fixéronse os criterios interpretativos tras consultar cos diversos centros da USC, e tras a proposta da Comisión Xeral de Validacións e Recoñecementos.

Á vista de todo isto, cómpre modificar o apartado 4.1 do Artigo 4 da RR de 27 de outubro de 2008, que pasaría a quedar redactado como segue:

“4.1.-Titulacións de Grao

1. Para determinar o recoñecemento de créditos teranse en conta os estudos cursados, a natureza dos mesmos e a súa correspondencia cos obxectivos e competencias que establece o plano de estudos para cada módulo ou materia, segundo o establecido na Normativa de transferencia e recoñecemento de créditos para titulacións adaptadas ao EEES aprobada no Consello de Goberno do 14 de marzo de 2008.

2. A solicitude de recoñecemento deberá dirixirse á Unidade de Xestión Académica correspondente, que, no seu caso, a remitirá para informe ao Centro. En cada centro, a Comisión de Validacións ou a que teña competencias na materia emitirá informe académico sobre o recoñecemento conforme aos criterios contemplados nesta norma. Os informes académicos deberán ser necesariamente motivados .

3. Con relación á formación básica, os criterios de recoñecemento serán os seguintes:

- a) Cando a titulación de destino pertenza á mesma rama que a de orixe, á vista do expediente de cada alumno o centro determinará o recoñecemento, entre os 36 créditos obrigatorios e os 60 créditos ECTS posibles, sinalando en cada caso as materias que o alumno debe cursar. No caso de materias de formación básica que xa fosen obxecto de recoñecemento noutro centro e/ou universidade, o recoñecemento poderá facerse sobre as materias xa recoñecidas ou ben sobre as materias de formación básica cursadas realmente polo alumnado (antes do recoñecemento).
- b) Cando a titulación de destino non pertenza á mesma rama que a de orixe, pero nesta existan materias de formación básica da rama daquela titulación, recoñeceranse os créditos correspondentes ás devanditas materias de formación básica.
- c) Recoñecemento de créditos das titulacións universitarias que habilitan para o exercicio de profesións reguladas:
 - No caso de títulos que habiliten para o exercicio de profesión regulada recoñeceranse automaticamente tódolos créditos de formación básica das titulacións que estean afectadas pola mesma orde ministerial que establece os requisitos de verificación.
 - Os créditos de formación básica obtidos en titulacións que non establecen requisitos de verificación, con independencia da rama de coñecemento á que pertenza a titulación serán recoñecidos, segundo determine o órgano competente do centro ou titulación, noutra titulación suxeita a requisitos de verificación de profesión regulada atendendo á súa adecuación ás

competencias que para a formación básica determine a orde da titulación. No caso de títulos que habiliten para o exercicio de distinta profesión con requisitos de verificación actuarase do mesmo xeito.

- Cando se recoñezan menos créditos de formación básica dos establecidos na titulación de destino do alumnado, o órgano competente do centro ou titulación, determinará qué materias deberá cursar o estudante para obter tódalas competencias determinadas na orde cos requisitos de verificación que regula a titulación ata completar a formación básica. Estas materias que é necesario cursar para ter as competencias poderán ser computadas con outro carácter.
- Cando a titulación de destino non estea afectada por Orden Ministerial con requisitos de verificación para profesión regulada, e a de orixe si, seguirase o procedemento previsto nas letras a) e b) anteriores.

Excepcionalmente, se unha materia de formación básica ten os mesmos contidos e competencias dunha materia obrigatoria, poderá recoñecerse esta, pero o alumno terá que completar a formación básica no mesmo número de créditos que a materia recoñecida.

En caso dos créditos de materias de formación básica dunha mesma titulación impartida en distintos centros, ou a existencia de táboas de recoñecemento, a Unidade de Xestión Académica poderá resolver directamente a petición sempre que existan precedentes de recoñecemento e se trate de materias con idéntica denominación.

No procedemento de recoñecemento da formación básica no expediente do alumno faranse constar as materias cursadas na titulación de orixe, coa súa denominación, créditos correspondentes e cualificación, de forma que a Comisión do centro con competencias na materia só informe, de ser o caso, das materias de formación básica que terá que cursar o solicitante para completar os créditos de formación básica da titulación. A este respecto os centros poderán recomendar a matrícula noutras materias incluídas as de formación básica que completen as carencias formativas producidas polo recoñecemento desta formación ao aplicar a normativa vixente.

4. Para o resto dos créditos, poderán recoñecerse tendo en conta a adecuación entre as competencias e os coñecementos adquiridos, ben noutras materias ou ensinanzas cursadas polo estudante, ben asociados a unha previa experiencia profesional, e os previstos no plano de estudos ou que teñan carácter transversal. Para ilo, os centros, tendo en conta as competencias acreditadas polo alumnado e a vista da información ou informes que considere oportuno, poderá adoptar algunha ou algunhas das seguintes propostas de resolución:

- Recoñecemento completo de materias ou módulos, indicando a cualificación correspondente
- Denegación de recoñecemento de materias ou módulos
- Proposta de exención de realización de parte dos créditos dunha ou varias materias ou módulos

Nos dous primeiros casos remitirase a proposta á Unidade de Xestión Académica para que dite a correspondente Resolución e anote o resultado no expediente do alumno, debendo liquidar os prezos que se corresponden. No caso de materias ou módulos denegados o alumno pode solicitar que se transfiran ao expediente.

No caso de exención de realización de parte dos créditos, a Comisión con competencias en validacións de estudos, emitirá un Acordo indicando os estudos, traballos ou actividades que debe realizar o alumno para superar as materias na súa totalidade así como a súa equivalencia en créditos. O alumno neste caso deberá matricularse da/s materia/s e módulos, afectada pola resolución de recoñecemento parcial, na súa totalidade.

Este Acordo da Comisión deberá notificarse ao coordinador da materia e será vinculante para o profesorado encargado da docencia da/s materia/s. Este profesorado deberá avaliar ao alumnado daqueles contidos e

competencias que se indiquen no acordo como non superados e deberán ter en conta os créditos superados a efectos de establecer a cualificación final na acta da materia ou do módulo. A cualificación final da materia será a media ponderada entre a cualificación dos créditos que se recoñeceron pola Comisión e a dos créditos superados, e deberán ser incorporados á acta polo profesorado que avalíe ao alumno”.

Santiago de Compostela, 10 de xaneiro de 2011

O Reitor



Juan J. Casares Long

DECANOS E DIRECTORES DE CENTROS DA UNIVERSIDADE DE SANTIAGO DE COMPOSTELA/
VICERREITORÍA DE ESTUDIOS DE GRAO E POSTGRAO/ SECRETARIA XERAL/ SERVIZO DE XESTIÓN
ACADÉMICA/ SERVIZO DE XESTIÓN DE OFERTA E PROGRAMACIÓN ACADÉMICA/ OFICINA DE
INFORMACIÓN/ UNIDADES DE XESTIÓN ACADÉMICA/OFICINA DE ANÁLISE DE RECLAMACIÓNS